

## Sujet: Voll im Bild

Wenn de friener vo dir hesch e Fotti gmacht,  
hesch „Cheese“ gsait und in d Linse glacht  
vom Fotograaf, wo zerscht professionell  
s Liecht het gmässe an dr Stell,  
wo de gstande bisch mit dym braite Grinse,  
denn mit zweenig Liecht wär s Bild in d Binse;  
är het dr Blitz au yygstellt bi Bedarf,  
am Objektiv drait, bis de scharf  
hesch ussgseh uf däm Fotteli  
und nit verschwumme wie-n-e Dotteli.  
Hit goot, dasch aigetlig sympathisch,  
die ganzi Sach vollautomatisch,  
bruuchsch kai Fotograaf meh, kai Kamera,  
muesch aifach nur e Natel ha,  
das hebsch vor dy Gsicht und druggsch uf s Knepfli  
und scho hesch e Selfie gmacht vo dym Kepfli.  
Doch ass den Applaus kriegsch vo de Kollege,  
muesch scho guet dir iberlege,  
an weelem Ort und zue weelere Stund  
und vor weelem Hintergrund  
de das Bildli machsch und uf weeli Wyys  
den uffalle kasch um jede Bryys,  
eb bim Sinnele am Palmestrand,  
bim Extremsport im Bärner Oberland,  
bim Suffe vom-e-ne Bier us Hopfe  
oder mit Stars, wo dir uf d Schultere klopf.  
Muesch toll usseh und jung und frisch,  
au wenn de nimm de Jingschti bisch,  
und duet s di nit geniere,  
kasch au fiidleblutt posiere,

denn je dimmer de duesch, dasch s Glatte dra,  
deschto greesseren Erfolg wirsch ha.

Wenn dy Gsicht dir nit so gfallt,  
machs ch e Selfie vo dym Fiidle halt:  
Muesch aifach d Hand nach hinde stregge  
und s Hinter so in d Heechi regge,  
ass d Spalte gnau vor em Natel liggt,  
drzue hesch d Bai in de Kney lyycht gniggt,  
und zem s Ganze no perfäggt z zentriere,  
sottsch vor em Knipse kontrolliere,  
ass d Symmetrie vo baide Bagge stimmt,  
wil das em Bild dr Raiz sunscht nimmt.  
Doch hesch Ibergwicht und entspricht dy Form  
in punkto Ussmaass nit dr Norm,  
und isch s Fuudi z brait, denn due nit wild:  
Mach aifach e Panoramabild!

Wäm e gweehnligs Fotti nimme gniegt,  
wil är drvo kai Kick meh kriegt,  
dä macht sy Keerper styff und starr  
und leggt sich so total bizarr  
elai oder mit e baar Kumpane  
woogrächt schwäbend neymen aane,  
wo-n-är in dääre Pose steert  
und iberhaupt nit aanegheert:  
uf e neye Bürotisch,  
ins Zolliaquarium zmitzt in d Fisch,  
uf em Mafiaboss sy Luxuskarre,  
uf e Motorrad bym freyhändig Fahre,  
iber e Gletscherspalte oder au  
in d Sauna mit em Chef syner Frau.  
Das Bild wird denn uf Facebook poschtet,  
au wenn s aim d Stell und d Gsundhait koschtet.  
*Planking* haisst das und bsunders isch dra:  
Erfunde hänn sy's in Kanada.  
Dä Drang, sich wie-n-e Brätt z verstyffe,  
kasch psychologisch so begryffe,

ass die wie Brätter usseh wänn,  
wil sy au vor ihrem Kopf ains hänn.

S git Lyt, die bruuche's no vyl wilder,  
die blöffe mit bewegte Bilder;  
fir die git's d Go-Pro-Kamera,  
die schnallt me sich an d Stirnen aa  
und filmt drmit nach Härzensluscht  
und ohni Riggsicht uf Verluscht  
alles, was vor dr aigene Nase  
passiert, wenn me duet ummeraase  
uf Velo, Snowboard oder Ski,  
Hauptsach, s isch schnäll und hesch Spass drby.  
So het zem Byschpyl aine welle  
e Mountainbike-Rekord ufstelle:  
Är fahrt dr Hang ab wie nit ganz bache  
und duet drvo e Video mache,  
wo syny Heldetat dokumentiert  
und allne zaigt, zue was ass es fiehrt,  
wenn so-n-e Sportler im Ibermuet  
sy Hirni dehai vergässe duet.  
Syny Spring sinn, zuegäh, spektakulär,  
doch s Lande fällt ihm zimlig schwär,  
är straißt e Tanne, iberschloot sich brutal,  
und d Rega fliegt ihn denn ins Spital:  
D Bai sinn broche und au s Gnigg isch nimm hail,  
aber s Filmlü im Youtube isch megagail.  
En andere seesch in den Alpe  
wyt wäg vo dr Pischte dr Schtaiss uf tschalpe,  
denn dert, wo s gfährlich isch und verbotte,  
findsch laider immer eso Idioten,  
wo filme mit heggschtem Risiko  
zem im Internet e „Like“ z bikoo.  
Dä fahrt uf de Ski denn bolzegrad  
bi-m-ene Gfäll vo sibzig Grad  
dr Stailhang aabe, das Kamuff,  
und d Kamera nimmt alles uf.  
Är macht e Salto, ganz e tolle,

und bringt e Schneebrätt so ins Rolle,  
wo-n-är am Änd denn drunter kunnt:  
Jetzt suecht ihn dr Lawinehund.

Me frogt sich, wo das no aane fiehrt,  
wenn hit bald jede sich fotografiert  
oder filmt drby, wie-n-är Mieh sich duet gää,  
sich ganz ohni Hemmig drnäabe z benää,  
und statt die pyynlige Bildli z verstege  
im ene Kaschte im hinterschten Egge,  
verbraitet är sii im Internet,  
wil dr ganze Wält är zaige wett,  
wie toll är isch und iberhaupt,  
was är so alles sich erlaubt.  
Das isch so Mode und liggt im Trend,  
denn jede will, ass me-n-en kennt,  
und vo ihm schwätzt, egal wyyso,  
und syny Selfies „liked“ und d Video.  
S isch glyych, wie hohl ain isch und dumm,  
im Internet fyylt är sich s Maximum.  
Do kasch nyt mache, au wenn's dir nit gfallt,  
denn die Sälbschtdarsteller verkerpere halt,  
dr wohry Gaischt vo unsererer Zyt:  
E Huffe Pixel und drhinter nyt.